



**KEMENTERIAN SUMBER ASLI
DAN KELESTARIAN ALAM**

TEKS UCAPAN

YBHG. DATUK DR. CHING THOO A/I KIM

KETUA SETIAUSAHA

KEMENTERIAN SUMBER ASLI DAN KELESTARIAN ALAM

SEMPENA

**MAJLIS PERASMIAN PROGRAM CEPA - SKUAD NRES LESTARI
2026**

MASJID AL-HASANAH, BANDAR BARU BANGI, SELANGOR

8 FEBRUARI 2026 (AHAD)

Selamat Pagi, Salam Sejahtera dan Salam Malaysia MADANI

Terima kasih kepada Pengerusi Majlis.

- 1. Yang Berbahagia Dato' Seri Ir. Dr. Zaini Ujang**
Presiden Friends of Langat River dan Sahabat ALAM
- 2. Yang Berusaha Puan Shareen Shariza binti Dato' Abdul Ghani**
Pengerusi MGTC
- 3. Yang Berusaha Tuan Haji Azarol bin Faizi**
Ketua Pegawai Eksekutif Kumpulan Bateriku (M) Sdn Bhd
- 4. Yang Berusaha Tuan Mohd Safian bin Abdul Rahman**
Nazir Masjid Al Hasanah
5. Rakan-rakan media
6. Tuan-Tuan / Puan-Puan yang saya hormati sekalian,

PENGENALAN

1. Tahniah dan terima kasih kepada semua yang hadir dan dapat berkumpul hari ini bagi menjayakan Program Komunikasi, Pendidikan dan Kesedaran Awam (CEPA) - Skwad NRES Lestari.
2. Terlebih dahulu, saya ingin merakamkan penghargaan dan terima kasih kepada semua pihak yang telah menjayakan penubuhan Skwad NRES Lestari, yang dirangka sebagai satu pasukan sokongan strategik bagi memperkukuh penyelarasan, pelaksanaan dan komunikasi strategik kementerian.
3. Program CEPA bersepadu yang kita bawakan kepada komuniti ini, mencerminkan komitmen berterusan Kementerian dalam memperkukuh amalan gaya hidup lestari dan menjadi agen perubahan demi masa depan yang sejahtera dan lestari.

Hadirin yang saya hormati,

CEPA SKUAD NRES LESTARI TERUS KEPADA KOMUNITI

4. Dalam landskap semasa yang semakin mencabar dan dinamik, pelaksanaan dasar serta inisiatif berkaitan sumber asli dan kelestarian alam memerlukan pendekatan yang lebih tersusun, responsif dan bersepadu.
5. Justeru, CEPA menerusi Skwad NRES Lestari diwujudkan sebagai platform strategik kementerian dalam memperluas penyampaian maklumat, pendidikan awam serta penglibatan komuniti merentasi pelbagai lapisan masyarakat. Ini termasuk kerjasama bersama agensi kerajaan, pihak swasta, pertubuhan bukan kerajaan (NGO), institusi pendidikan serta komuniti setempat.
6. Penubuhan Skwad NRES Lestari terdiri daripada anggota Kementerian dan rakan strategik adalah langkah proaktif kementerian untuk memperkasakan keupayaan organisasi dalam memastikan masyarakat menerima, memahami, seterusnya melakukan perubahan dalam mendukung agenda kelestarian secara menyeluruh.
7. Program ini merupakan inisiatif kolaborasi strategik antara Kementerian bersama rakan strategik, korporat: Bateriku (M) Sdn. Bhd., NGO's: Friend of Langat River; Komuniti: Masjid Al Hasanah dan komuniti setempat; IPT: Politeknik, UPM, UKM; rakan media yang memberi tumpuan kepada pendidikan, advokasi dan tindakan komuniti dalam kelestarian alam, pengurusan sumber asli yang mampan, keselamatan kenderaan serta pengurusan sisa elektronik atau e-waste.
8. Pendekatan turun padang dan komunikasi bersemuka yang mesra komuniti membolehkan mesej kelestarian disampaikan secara lebih

berkesan, mudah difahami dan relevan dengan realiti kehidupan seharian masyarakat. Dalam masa yang sama, ia membuka ruang komunikasi dua hala bagi membolehkan maklum balas diterima secara langsung oleh kementerian.

9. Saya difahamkan Skwad juga akan berada di lokasi-lokasi komuniti bagi memberi advokasi dan akan bergerak ke lima (5) zon meliputi zon utara, selatan, timur dan Sabah. Hari ini, Skwad berada di Zon Tengah iaitu Selangor. Namun, Skwad akan bergerak aktif bulan Ramadan ini di Bazar-bazar Ramadan dan pasar raya bagi menggalakkan aktiviti Kempen Hindari Plastik Sekali Guna.
10. Inisiatif ini diharap dapat memupuk budaya tanggungjawab bersama serta menggalakkan penglibatan aktif masyarakat sebagai rakan pelaksana kepada agenda kelestarian negara.

Hadirin sekalian,

11. Pendekatan sebegini secara tidak langsung dapat mendekati rakyat untuk ***Inform, Educate, Empower & Advocate*** supaya kita **semua mampu membuat perubahan meskipun tindakan yang kecil tetapi impaknya besar di kemudian hari.**
12. Tuan-tuan bayangkan. Selama ini kita membesar dalam persekitaran yang dikelilingi plastik. Tahukah anda, mikroplastik ini telah lama ada dalam tubuh manusia Mikroplastik telah memasuki rantai makanan kita melalui beberapa cara. Daripada laut melalui ikan dan kerang-kerangan tersalah anggap mikroplastik sebagai makanan. Apabila kita makan hidupan laut tersebut, plastik itu berpindah kepada kita.
13. Begitu juga dengan air minuman. Kajian menunjukkan mikroplastik ditemui dalam air paip mahupun air botol mineral. Sebab itu, elakkanlah membeli air mineral plastik dan bertukarlah kepada air mineral kotak yang kini telah pun banyak berada di pasaran. Kalau membawa botol air sendiri adalah lebih elok.

14. Kita kena sedar, usaha ke arah perubahan gaya hidup ini dan mewujudkan masyarakat yang lebih peka terhadap alam sekitar dan bukan sekadar usaha kerajaan, tetapi satu gerakan rakyat (bottom-up) untuk menjaga ekosistem alam semulajadi demi kesejahteraan kita dan generasi akan datang.
15. Oleh itu, NRES menerusi Skwad NRES Lestari ini turut menjadi ejen perubahan berperanan sebagai duta yang menyebarkan maklumat mengenai dasar-dasar kelestarian, seperti:
 - Kempen kesedaran sifar plastik dan mesin kompos
 - Pengurusan sisa elektrik dan elektronik (e-waste).
 - Pemeliharaan sumber asli dan pengurusan biodiversiti.
 - Kempen Beli Produk MyHijau
 - Kempen Tanam Pokok
 - Advokasi cuaca dan perubahan iklim
 - Mineral dan tanah
16. Skwad ini juga bertindak sebagai perantara antara rakyat dan kementerian. Mereka membantu memantau aktiviti yang boleh merosakkan alam sekitar (seperti pencemaran sungai atau pembalakan haram) dan menyalurkan maklumat tersebut kepada pihak berkuasa dengan lebih cepat.
17. Pelaksanaan program ini selari dengan agenda nasional berkaitan perubahan iklim, ekonomi kitaran, keselamatan awam dan kesejahteraan rakyat, di samping mengukuhkan peranan NRES sebagai peneraju dalam pengurusan sumber asli dan pemeliharaan alam sekitar negara, sejajar dengan aspirasi Malaysia MADANI.
18. Dari sudut kementerian, pelaksanaan inisiatif ini mengukuhkan penjenamaan NRES sebagai kementerian yang dekat dengan masyarakat serta memperlihatkan komitmen berterusan kerajaan dalam mendukung dasar dan agenda kelestarian negara. Ia juga membina sokongan akar umbi terhadap dasar-dasar alam sekitar dan sumber asli yang dilaksanakan kerajaan.

Hadirin yang dihormati,

IMPAK DAN MANFAAT PROGRAM

19. Seperti pagi tadi, kita turut adakan aktiviti Kutip Sampah Sambil Riadah (KUDAH) di Taman Tasik Cempaka, Bangi. Aktiviti sebegini bukan sahaja memberikan kesedaran malah turut menyokong agenda pengurangan karbon melalui pengukuran karbon offset hasil kutipan sisa, mengukuhkan kerjasama strategik antara kementerian, industri dan rakan alam sekitar, serta memastikan rakyat mengenali peranan, fungsi dan inisiatif NRES dalam memelihara sumber asli dan kelestarian alam.
20. Impak pelaksanaan program kesedaran alam sekitar seperti Skwad NRES Lestari dapat dilihat melalui peningkatan tahap kesedaran awam terhadap isu perubahan iklim, pencemaran, biodiversiti serta kepentingan memelihara alam sekitar.
21. Program ini turut mendorong perubahan tingkah laku masyarakat ke arah gaya hidup lestari seperti pengamalan kitar semula, pengurangan penggunaan plastik dan penjimatan tenaga. Melalui penglibatan aktif dalam aktiviti lapangan, komuniti setempat juga digalakkan untuk menjadi agen perubahan dalam persekitaran masing-masing.
22. Di samping itu, Skwad NRES Lestari membuka ruang kepada pembinaan jaringan strategik bersama NGO, institusi pendidikan, pihak berkuasa tempatan dan agensi berkaitan dalam menjayakan agenda alam sekitar secara bersepadu dan mampan.

Hadirin yang dihormati,

NRES PENERAJU SUMBER ASLI DAN KELESTARIAN ALAM

23. Untuk makluman semua, Kerajaan menubuhkan NRES bertujuan untuk mengintegrasikan pengurusan sumber asli dengan agenda perubahan iklim dan kelestarian alam sekitar. Fokus utamanya merangkumi:

- **Pengurusan Sumber Asli:** Menjaga hutan, air, tanah, dan mineral negara.
- **Kelestarian Alam Sekitar:** Menangani pencemaran dan mempromosikan ekonomi kitaran (*circular economy*).
- **Perubahan Iklim:** Menyelaraskan strategi mitigasi dan adaptasi terhadap pemanasan global

24. Strategi NRES kini beralih daripada sekadar "pemuliharaan" kepada "transformasi ekonomi hijau". Antaranya:

a) Pencapaian Aspirasi "Net Zero"

Malaysia mensasarkan pelepasan gas rumah hijau (GHG) bersih sifar seawal tahun 2050. NRES sedang memperincikan **Rang Undang-Undang Perubahan Iklim** dan membangunkan **Dasar Karbon Kebangsaan** untuk menggalakkan industri mengurangkan jejak karbon mereka.

b) Pemuliharaan Biodiversiti & Pasukan Rimba

Kementerian komited memperkasakan inisiatif ***Ecological Fiscal Transfer (EFT)*** untuk memberi insentif kepada kerajaan negeri yang mengekalkan kawasan hutan. Selain itu, penggunaan teknologi seperti dron dan AI dalam penguatkuasaan hutan akan dipertingkatkan.

c) Transformasi Industri Mineral

NRES memberi tumpuan kepada pembangunan **Unsur Nadir Bumi Bukan Radioaktif (NR-REE)** secara mampan. Matlamatnya adalah untuk mewujudkan rantai nilai lengkap di Malaysia, dari perlombongan hingga ke pemprosesan akhir.

d) Ekonomi Kitaran dan Pengurusan Sisa

Kerajaan juga berhasrat untuk mengurangkan kebergantungan kepada tapak pelupusan sampah dengan mempromosikan konsep *Extended Producer Responsibility* (EPR), di mana pengeluar bertanggungjawab ke atas kitaran hayat produk mereka.

PENUTUP

25. Sebagai penutup, saya menyeru semua pihak agar terus menyokong dan memperkukuh pelaksanaan Program CEPA menerusi Skwad NRES Lestari. Usaha yang bermula daripada tindakan kecil di peringkat komuniti mampu membawa perubahan besar dan memberi kesan jangka panjang terhadap kelestarian alam, pengurangan pelepasan karbon serta kesejahteraan masyarakat.
26. Saya juga berbesar hati dengan penerimaan tuan/puan dengan CEPA hari ini. Secara tidak langsung Tuan/puan juga adalah Rakan NRES yang akan menjadi agen perubahan serta mendidik masyarakat lain untuk turut sama membuat perubahan dalam amalan seharian.
27. Saya turut mengalu-alukan penglibatan syarikat korporat yang lain untuk sama-sama menjadi rakan strategik bagi membantu Kerajaan melalui Tanggungjawab Sosial Korporat (CSR) tuan/puan

sebagai jambatan penghubung antara aspirasi kerajaan dan kehidupan rakyat. Dengan memanfaatkan jangkauan luas rangkaian korporat anda, setiap kempen kesedaran yang disembarkan bukan sekadar maklumat, tetapi adalah sumbangan nyata ke arah membina masyarakat yang lebih berinformasi dan progresif.

28. Saya penuh yakin, dengan komitmen padu semua pihak, kita mampu merealisasikan aspirasi Malaysia MADANI yang berteraskan kemampanan, keterangkuman dan keprihatinan terhadap alam sekitar demi generasi masa depan.

29. Saya akhiri ucapan saya ini dengan serangkap pantun:

Tinggi merimbun pohon jati,
Tempat berteduh di burung nuri,
Khazanah alam dijaga rapi,
Warisan mampan komuniti lestari.

Dengan ini, sukacitanya saya merasmikan Skuad NRES Lestari.

Sekian, terima kasih.